

Visoki predstavnik se obratio Venecijanskoj komisiji

Visoki predstavnik Paddy Ashdown danas je pred Venecijanskom komisijom govorio o ustavnim pitanjima u Bosni i Hercegovini. Venecijanska komisija je savjetodavno tijelo Vijeća Evrope za ustavna pitanja.

U svom izlaganju visoki predstavnik je rekao da je njegov cilj od početka mandata bio da "Bosnu i Hercegovinu dovede u stanje stabilnog napretka u stvaranju državnosti i pridruživanju EU."

"Jasno sam stavio do znanja da bi se Daytonski sporazum i Ustav BiH trebali posmatrati kao polazište, a ne kao krajnji domet. Od njihovog donošenja pokušavamo pomoći da se uspostave ustavni poredak i institucionalni okvir koji će ojačati osnov za funkcioniranje države umjesto da ga podrivaju."

Visoki predstavnik je naglasio da ukoliko BiH želi da se pridruži EU i NATO-u mora biti u potpunosti funkcionalna država i ništa manje od toga.

"Dani kada se o budućnosti Bosne i Hercegovine odlučivalo u mramornoj evropskoj palati ili u američkoj vojnoj bazi pripadaju prošlosti. U političkom razvoju BiH dostigli smo fazu u kojoj se samo građani BiH mogu dogovoriti o tome u kakvoj zemlji žele živjeti."

Visoki predstavnik je rekao da će se politički lideri BiH u budućnosti suočiti sa izborom – "da li će zadržati važeći ustav i snositi ekonomske, socijalne i političke posljedice ili će donijeti ustavne promjene koje su potrebne kako bi Bosna i Hercegovina postala stabilna, funkcionalna i prosperitetna zemlja u okviru Evropske unije."